

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 490662 25 St
Tuzla, 19.11.2025. godine

Općinski sud u Tuzli, sudija Antonela Đaković, kao stečajni sudija, u postupku prethodnog ispitivanja prijedloga za pokretanje stečajnog postupka nad dužnikom "LILAZ" d.o.o. za proizvodnju, promet i usluge Gradačac, ul. H.K. Gradašćevića bb., Gradačac, koje u svom sastavu ima podružnice: 1. "LILAZ" d.o.o. za proizvodnju, promet i usluge Gradačac, Podružnica broj 1 "CONDOR PUB" Gradačac, ul. H.K. Gradašćevića bb., Gradačac i 2. "LILAZ" d.o.o. za proizvodnju, promet i usluge Gradačac Podružnica broj 2, Mionica, ul. Mionica II bb Gradačac, dana 19.11.2025.godine donio je

R J E Š E N J E

POKREĆE SE PRETHODNI POSTUPAK radi utvrđivanja uslova za otvaranje stečajnog postupka nad imovinom dužnika "LILAZ" d.o.o. za proizvodnju, promet i usluge Gradačac, ul. H.K. Gradašćevića bb., Gradačac, koje u svom sastavu ima podružnice: 1. "LILAZ" d.o.o. za proizvodnju, promet i usluge Gradačac, Podružnica broj 1 "CONDOR PUB" Gradačac, ul. H.K. Gradašćevića bb., Gradačac i 2. "LILAZ" d.o.o. za proizvodnju, promet i usluge Gradačac Podružnica broj 2, Mionica, ul. Mionica II bb Gradačac, MBS: 32-01-0751-18, JIB: 421035041006.

Za privremenog stečajnog upravnika imenuje se Almira Tutundžić iz Gračanice, ul. Riječka broj 7.

Privremeni stečajni upravnik dužan je odmah po prijemu rješenja o imenovanju preduzeti radnje utvrđene odredbom člana 63. Zakona o stečaju FBiH (Službene novine FBiH br. 53/21), a naročito:

- obezbijediti imovinu dužnika i starati se o istoj,
- ima ovlaštenja da uđe u poslovne prostorije dužnik i provede neophodne radnje,
- utvrditi da li postoji razlog za otvaranje stečajnog postupka,
- ispitati da li će imovina stečajnog dužnika pokriti troškove stečajnog postupka,
- utvrditi da li se poslovanje stečajnog dužnika može u cjelini ili djelimično nastaviti u toku prethodnog postupka
- uraditi kontrolu poslovanja stečajnog dužnika
- kada je podnosilac prijedloga za otvaranje stečajnog postupka stečajni dužnik, dostaviti izjašnjenje da li je stečajni dužnik, odnosno organ ovlašten za zastupanje stečajnog dužnika podnio prijedlog za otvaranje stečajnog postupka u roku od 60 dana od dana nastupanja platežne nesposobnosti.

Privremeni stečajni upravnik dužan je podnijeti svoj pismeni izvještaj ovom sudu u roku od 30 dana od dana donošenja ovog rješenja u kome će izvijestiti ovaj sud o preduzetim radnjama i iznijeti svoje stručno mišljenje o tome da li postoje razlozi za otvaranje stečajnog postupka, odnosno da li postoje bilo kakvi izgledi za nastavak daljeg poslovanja dužnika.

Mjere pojedinačnog prinudnog izvršenja pokrenute protiv stečajnog dužnika se obustavljaju, izlučna i razlučna prava povjerioci ne mogu ostvariti u predhodnom postupku, stečajni dužnik ne

može raspolagati budućom stečajnom masom bez saglasnosti privremenog stečajnog upravnika i suda, a sve to u cilju osiguranja buduće stečajne mase.

Rješenje će biti objavljeno u „Službenim novinama FBiH“, web stranici Općinskog suda u Tuzli i na Internet stranici FIA-e te se pozivaju povjerioci da privremenom stečajnom upravniku bez odlaganja dostave prijedlog mjera osiguranja na predmetima stečajnog dužnika koje će eventualno zahtijevati.

Ovo rješenje će se dostaviti Odjeljenju registra ovog Suda, Zemljišno-knjižnom uredu Općinskog suda u Gradačcu, kao i Službi za geodetske i imovinsko-pravne poslove grada Gradačac, radi upisa zabilježbe otvaranja prethodnog stečajnog postupka.

O b r a z l o ž e n j e

Predlagač "LILAZ" d.o.o. za proizvodnju, promet i usluge Gradačac, ul. H.K. Gradaševića bb., Gradačac, kao stečajni dužnik podnio je dana 10.07.2025.godine ovom sudu prijedlog za otvaranje stečajnog postupka nad navedenim privrednim subjektom, zbog platežne nesposobnosti dužnika koji nije u stanju izvršavati svoje dospjele i potraživane obaveze plaćanja u dužem vremenskom periodu.

Stečajni sudija je zakazao ročište za saslušanje zastupnika predlagača za dan 24.09.2025.godine na kojem je zakonski zastupnik dužnika izjavio da ostaje kod prijedloga za otvaranje stečajnog postupka, a kao razlog ističe platežnu nesposobnost i nemogućnost izvršavanja dospjelih i potraživanih obaveza plaćanja u dužem vremenskom periodu, te je društvo prestalo sa radom Odlukom o prestanku poslovanja dana 09.07.2025.godine. Osnovna djelatnost društva je bila trgovina na malo u nespecijaliziranim prodavnicama pretežno hranom, pićima i duhanskim proizvodima pri čemu je zbog izrazito smanjenog obima poslovnih aktivnosti privredno društvo nije ostvarivalo zadovoljavajući obim prodaje, kao niti ostvarenje poslovnih prihoda od registrovane djelatnosti od maja 2023. godine. Račun društva otvoren kao glavni poslovni račun kod: MF banke a.d. Banja Luka-Poslovnica Tuzla je blokiran na dan 16.05.2023.godine. Društvo nema imovine, niti zaposlenika, a ima obaveze prema Poreznoj upravi FBiH u iznosu od 51.783,56 KM, a prema UIO RC Tuzla iznos od 34.296,33 KM, te je predložio sudu da odredi predujam za pokretanje prethodnog postupka, a kasnije i stečajnog postupka.

Stečajni sudija nakon što je utvrdio da je prijedlog za pokretanje stečajnog postupka podnesen od strane predlagača i da je isti dopušten u smislu odredbe člana 58. stav 2. i 13. Zakona o stečaju postupku, rješenjem od 24.09.2025.godine naložio je predlagaču da uplati novčana sredstva na ime predujma finansiranja troškova prethodnog postupka radi utvrđivanja uslova otvaranja stečajnog postupka. Predlagač je sudu 07.10.2025.godine dostavio dokaz o uplati predujma za finansiranje troškova prethodnog stečajnog postupka u iznosu od 3.000,00 KM.

Imajući u vidu dostavljenu dokumentaciju i to: Prijedlog za pokretanje stečajnog postupka od 10.07.2025.godine, Odluku o prestanku poslovanja broj: 01-02/25 od 09.07.2025.godine, Odluku o pokretanju stečajnog postupka broj: 01-03/25 od 09.07.2025.godine, Odluku o pokriću dijela gubitka broj: 01-01/25 od 31.03.2025.godine, Aktuelni Izvod iz sudskog registra od 26.05.2025. godine, Izvještaj Centralne banke Bosne i Hercegovine o računima poslovnog subjekta na dan 23.05.2025. godine, Bilans stanja na dan 30.06.2025.godine, Bilans uspjeha za period od 01.01.2025.godine – 30.06.2025.godine, Uvjerjenje Porezne uprave FBiH, KPU Tuzla, PI Gradačac od 28.05.2025.godine i Uvjerjenje UIO BiH, RC Tuzla od 04.06.2025.godine i izjavu

zakonskog zastupnika dužnika na ročištu za saslušanje, sud nije u mogućnosti da sam procijeni postojanje svih neophodnih uslova koje Zakon predviđa za otvaranje stečajnog postupka, te se donosi rješenje o pokretanju prethodnog postupka radi utvrđivanja uslova za otvaranje stečajnog postupka nad dužnikom, temeljem odredbe člana 61. stav 1. Zakona o stečaju („Sl. novine F BiH“, br.53/2021.).

Odluka iz stava 3. ovog rješenja donesena je temeljem odredbe člana 63. Zakona o stečaju, a nakon što je utvrđeno da privremeni stečajni upravnik ispunjava uslove za imenovanje utvrđene odredbom člana 71. Zakona o stečaju.

Na osnovu navedenog, temeljem citiranih odredbi zakona, sud je odlučio kao u izreci rješenja.

SUDIJA
Antonela Đaković

POUKA O PRAVNOM LIJEKU: Protiv ovog rješenja dozvoljena je žalba u roku od 8 (osam) dana, računajući od dana objavljivanja u Službenim novinama FBiH. Žalbu mogu uložiti stečajni dužnik i privremeni stečajni upravnik. Žalba se podnosi Kantonalnom sudu u Tuzli putem ovog Suda.